

Song Boux Banhcujiyin

两位班主任

德保县那甲中心校三年级 梁峰

Mwh doeg siujyoz, miz song boux banhcujiyin hawj gou ceiq nanzlumz, song boux de mboujdanh dwg boux lauxsae gou, engq lumj daxmeh gou, baengzyoux gou.

It nienzgaep seiz, banhcujiyin gou dwg boux mehmbwk gyaundeideu——Veiz lauxsae. Veiz lauxsae couh lumj dahcej dou, naihsim son gyoengqdou, hawj gyoengqdou hag ndaej cihsiz, roxdaengz dauhleix. Geiq ndaej miz dangz yijvwnz ndeu, Veiz lauxsae gangj sat le, couh hawj gyoengq doengzhag guh lienhsij. Guh dwk guh dwk, sawqmwh, “ciengq” cih saw neix gou mbouj rox sij, gou couh dingz roengzdaej, doeng yawj sae muengh. Couh youq mwh haenx, Veiz lauxsae cingqngamj byaij gvaqdaej, de yawjraen gou yienghneix, couh rox gou deng nanz dwk lo, couh yiemzsuk naeuz: “Cih saw neix, haxbaenh gou ngamq gangj gvaq, mwngz itdingh dwg mbouj dingq lauxsae gangj, yienghneix

couh mbouj geiq ndaej lo.” Daengx ban doengzhag cungj yawj gvaq gou daej, gou naj nding rwz dit. Dingz yaep ndeu le, Veiz lauxsae youh riu naeuz: “Mwngz siengsiengj, ciengqgo seiz yungh gijmaz ciengq?” Veiz lauxsae baenzneix gangj, gou couh rox lo, couh sikhaek nyinhcaen sij hwnjdaej.

Seizgan gvaq ndaej caen vaiq, gou hwnj sam nienzgaep seiz, banhcujiyin gou vuenh baenz Liengz lauxsae, de hwnjdangz gig hozyoz. Miz baez ndeu, Liengz lauxsae hawj dou hwnj dangz cozwvwnz caeuq bouxwnq mbouj doengz ndeu. De sien dawz daizdaengq baiz baez cih “回”, caiq hawj gyoengq doengzhag faen baenz song cuj, cuj ndeu dang “hagseng



hwnjdangz”, cuj ndeu dang “bingzveij lauxsae”. Gijmaz cungj cunjbei ndei lo, daengz hwnjdangz lo, Liengz lauxsae daj ndaw daeh dawz ok haujlai mbaw youzbiuq hawj gyoengq doengz-

hag yawj, miz nding miz loeg, miz hung miz iq…… hawj gyoengqdou yawj ndaej dava bae. Ciepdkw Liengz lauxsae dawz song mbaw okdaej nem youq gwnz hwbzanj, hawj dou rara yawj miz gijmaz mbouj doengz, gyoengq doengzhag cungj ceng bae ra okdaej: Miz di naeuz saek mbouj doengz, miz di naeuz yiengh gyaiej mbouj doengz, miz di naeuz hung iq mbouj doengz…… Moix boux gangj cungj mbouj doengz. Dangz haenx, gou sawqmwh fatyienh, mbaw youzbiuq iq gingqyienz miz yienghneix lai dei-hueng hawj raeuz cazyawj. Lingz roengzdangz yiengj lo, gyoengqdou cix lij maez youq ndaw dangz cozwvwnz mizyinx neix, mbouj siengj roengz-dangz.

Song boux banhcujiyin gou yienz-naeuz bujdungh, danhseih de nyinh-caen son dou cihsiz, hawj gou daengx ciuh vunz cungj mbouj lumz ndaej.

(指导老师: 农色票)

Va'byaekyouzcai Ranzmbanj

家乡的油菜花

环江思恩镇西南小学二年级 罗继来



Youq seizcin, doenghnaz ranzmbanj gou, hai doh baenz benq baenz benq va'byaekyouzcai.

Ndaw doenghnanz, va'byaekyouzcai henj-rwgrwg, duj caenx duj, couh lumj youq gwnz dieg bu caengz gim henjrwgrwg he. Ndit daengngoenz ciuq youq gwnz va'byaekyouzcai, va'byaekyouzcai yienhndaej engq gyaundeideu, engq lwenqda, engq sawj vunz maez de.

Haeuj gyawj sijsaeq yawj, miz mbanj va-byaekyouzcai gaenq hai caez lo, seiq dip va mbanjmbit henjrwgrwg gig gyaundeideu, dipva cingjcingj caezcaez humx dwk simva; miz mbanj va ngamq hai buenq he, yaek hai mbouj hai hai ok it song dip va, couh lumj dahniq launyaenq nei, ndoj youq ndaw geh mbaw; miz mbanj va lij dwg valup, baihdaw mumjgyumq daeuq ok di saekhenj he, venj youq gwn nye'byaek.

Raq rumz ndeu ci gvaqdaej, ci daej raq heiqa homfwdwd ndeu, va'byaekyouzcai riengz rumz bibuengq, youq ndaw geh mbaw ndoj bae ndoj dauq, lumjnaeuz caeuq dou guh yahndoj nei, seiz raen seiz mbouj raen. Dang mwngz ndwn youq haenznaz, muengh coh giz gya bae, daengx doenghnaz couh lumj aen haijva he.

Va'byaekyouzcai gyaundeideu, yinx vunzlai daej ngonzyawj. Gyoengqvunz doxceng caeuq va-byaekyouzcai ingjsiengq; miz mbanj vunz youq ndaw va guh'angq, ndaw doenghnaz dauqcaeq dwg sing riu, nauhyied lai lo. Daengz haemh lo, gyoengqvunz cungj mbouj sijndaej baema.

Va'byaekyouzcai ranzmbanj gou caen gyaue! Gou gyaiez va'byaekyouzcai ranzmbanj gou.

(指导教师: 韦雅情)

Baengzyoux Gou——Vunzgihi

我的朋友——机器人

环江思恩镇西南小学六年级 罗玉节

Ngoenz ndeu haetromh, gou deng daxmeh heuh ndiu lo. Gou baez hai conghcueng, couh raen gyaq cizswnghgihi ndeu dingz youq ndaw hongh, daj ndaw cizswnghgihi byaij ok boux vunzgihi ndeu.

Boux vunzgihi neix gig geizheih. De rox mbin, mbin daengz gwnz daizsaw gou daej. Gou sijsaeq yawjyawj bouxhek neix: Gwnz gyaiej miz song diuz gaeu, gwnz gaeu sieng miz song aen giuzcaijsaek. Song aen giuz yaep he bienqbaenz saekhenj, yaep he bienqbaenz saeknding, caen gyaundeideu. Boux vunzgihi neix mbouj miz naeng, hix mbouj miz bak, gaiqfwngz cijmiz seiq lwgfwngz, gojyij yietraez, ndaej yaep he hai, yaep he gven, couh lumj gij gimz duzbaeu nei. Din gig raez, gojyij byoq ok feiz daej, de couh dwg baengh aen neix rox mbin.

Gou cingq ngeizngwd yawj de, sawqmwh de gangjvah lo: “Ha! Mwngz ndei, gou heuhguh Sahmuj, dwg daj gwnz ronghndwen daej. Dingq gangj, gwnz singhgiuz sou gig gyaundeideu, dwg gaiqdieg vaiqvued ndeu, gou siengj daej

youzyouz, mwngz naengz dang daujyouz gou lwi?” Gou anq dwk gangj: “Ndei ha!” Gangj sat, gou couh daiq de okbae lo. Dou sien bae youz gunghyenz, gaendwk daejdaengz gwnz gai, doeklaeng daejdaengz ndaw bouqgaicawx. Gou daiq de cawx ndaej hauhlai doxgaiq, de daj ndaw dungx yut ok gaiq gim ronghsag ndeu daej, de gangj: “Hawj ngaenz hawj mwngz.” Gou riu dwk naeuz: “Dou mbouj yungh cungj neix.” Gou daj ndaw daeh mbon ok mbaw cienz ndeu daej, doiq de gangj: “Mwngz yawj, dou dwg yungh cungj neix.” Gangj sat, gou couh bae gyau cienz lo. Byaij ok bouqgaicawx, boux-vunzgihi naeuz: “Docih mwngz, ngoenzneix gou gig vaiqvued, aen neix soengq hawj mwngz.” Gangj dwk, de couh daj gwnz hoz mbaet aeu aen ndaundeiq ndeu hawj gou, de gangj: “Neix dwg ndaundeiq vaiqvued, maqmuengh mwngz ciengxlwenx vaiqvued.” Gangj sat, de fwt dwk mbin hwnj mbwn bae lo.

Boux vunzgihi neix dwg baengzyoux ndei gou, gou naengz roxnaj de, gou gamjdaengz gig vaiqvued ha!

(指导老师: 罗凤)

Daxmeh Gyaiez Lengj

爱美的妈妈

贵港市覃塘区蒙公乡高占小学四(2)班 李禧

Daxmeh gou ndaej 35 bi lo, de ndang reuxred, naj cehgva, yawj hwnjbae gig gyaundeideu. Daxmeh gou gig gyaiez cangndang.

Daxmeh gou aenda dwg dagaenhyenx, vih mbouj hawj bouxwnq rox, couh daiq gingq-dayaem, loengh ndaej gyanghaemh guhhong dauqma seiz, song ceh da hoengzfwdfwd, caen lumj lwgda duzduq nei. Daxboh yawjraen le, gig sim'in, couh bang daxmeh cawx fouq nganxingq miz gyaq ndeu dauqma. Hoeng, mbouj geij ngoenz, daxmeh youh daiq gingqdayaem lo. De naeuz daiq fouq nganxingq

miz gyaq mbouj ndei yawj.

Daxmeh gyaiez cawx buhvaq. Baez daengz ngoenz singhgiz, daxmeh cungj rag daxboh bae haw. Dauqma seiz, daeh hung daeh iq cungj dwg cang rim buhvaq ha, haiz ha. Seizneix, daxmeh engq maez youq gwnz vangj cawx doxgaiq lo. Moix ngoenz gyanghaemh, daxmeh cungj ciemq yungh dennauj, de cungj youq ndaw “dauzbaujvangj” yawj baez youh baez, genj le youh genj, cawx gij buhvaq gij haiz swheij hab'eiq haenx. Gou caen mbouj mingzbej, daxmeh cawx baenz lai buhvaq guh gijmaz? Miz di buhvaq cawx ma caengz ndaej daenj, couh gvaqseiz lo. Daxboh naeuz, haenx dwg daxmeh gyaiez “lengj” lai. Gou dingq le, nyaenx mbouj ndaej fwt riu sing ndeu.

Daxmeh gou couhdwg bouxvunz yiengh-neix gyaiez cangndang, hoeng, daxmeh gou gig gyaiez gou, de hix gig gaenx guhhong, gou gyaiez daxmeh gou.

(指导老师: 覃珍团)